

戎事類占

戎事類占卷之十一

豫章李克家嗣守其業

同郡許慶之于家甫校

星類五

石氏曰南方赤帝其精朱鳥爲七宿井首鬼目杓喙星頸張喙翼翮軫尾司馬司火司南獄司南海司南方司羽蟲三百有六十

南方東井八星天之南門黃道所經七曜常行其中爲天之亭候主水衡事法令所取平也武密占曰井中爲三光正道五緯留守若經之皆爲天下無道不欲明明則大水鉞一星附井宿前主伺奢淫而斬之明大與井宿齊則用

鉞於大臣月宿其分有風雨月犯將死於兵歲星犯水溢
將軍惡之犯井鉞近臣爲亂兵起逆行入井川流壅塞焚
惑犯兵先起者殃又曰天子以水敗入守經旬下有兵守
三十日成勾己角動色赤黑貴人當之百川溢兵起填星
入犯兵起東北在觜而去東井其下亾地太白犯咎在將
久守其分君失政臣爲亂辰星犯星進則兵進退則兵退
又曰北兵起歲惡芒角動搖色赤黑爲水爲兵起客星犯
穀不登彗星犯民讒言其分兵災流星客星黃潤國安赤
黑秦分民流水災蒼黑雲氣入犯民有疾疫黃白潤澤有
客來言水澤事黑氣入爲大水常以正月朔日入時候之
井宿上有雲歲多水潦

南河三星與北河夾東井一日天之關門也主關梁南河
曰南戌一日南宮一日陽門一日越門一日權星主火兩
河戌間日月五星之常道也河戌動搖中國兵起河星不
具路不通水泛溢月出入兩河間中道民安歲美無兵星
明吉昏昧動搖邊兵起遠人叛月犯爲兵爲喪爲旱爲疫
行西南爲兵旱入南戌則民疫乘之四方兵起熒惑犯兩
河爲兵守三十日以上川溢守南河穀不登守南戌西果
不成在東則有攻戰填星乘南河爲旱民憂守之爲兵道
不通太白舍三十日川溢一日有奸謀守兩河爲兵起客
星守爲旱彗孛出爲兵守爲旱流星出爲兵喪邊戌有
憂蒼白雲氣入河通不通出而色青天子兵向諸侯

北河三星北河曰北戌一曰北宮一曰陰門一曰胡門一
曰衡星主水動搖胡兵起一曰河星不明四夷交侵五星
出入畱舍爲兵起熒惑從東入北戌九十日有兵一曰出
北戌北守之邊將有不請於上而用兵外國者勝填星守
兵起若守戌西五穀不實太白舍北戌三十日有內諜守
陰門不出百日天下兵悉起辰星守外兵起邊臣有謀畱
止則兵起四方客星入犯奸人在中人自東兵起期九十
日守之爲大水流星經兩河間天下有難入爲北兵入中
國關梁不通蒼白雲氣入犯邊有兵

天鐫三星在五諸侯南東井北鐫器也主盛饘粥以給貧
餒明則歲豐暗則歲惡

五諸侯五星在東井北王斷疑刺舉戒不虞理陰陽察得失亦曰主帝心一曰帝師二曰帝友三曰三公四曰博士五曰太史五者常爲帝定疑議星明大潤澤則天下治歲星犯兵起三年熒惑犯大臣叛不成太白犯諸侯興兵亡國客星犯王室亂諸侯亡地秦國殃

積水一星在北河西北所以供酒食之正也不見爲災歲星犯民饑熒惑犯爲兵爲水辰星犯爲水旱一曰五星犯守有水災水兵起客星犯兵起大水蒼白雲氣入犯天下有水

積薪一星在積水東北供庖厨之正也星不明五穀不登去積水五尺天下安遠若一文饑荒民流熒惑犯爲旱爲

兵爲火災赤雲氣入犯爲水災

水府四星在東井西南水官也主隄塘道路梁溝以設隄防之備星明大有水災熒惑入有謀臣辰星入爲水客星入天下大水流星入色青所主之邑大水赤爲旱

水位四星在東井東北主水衡明小吉明大動搖水橫流民以水饑變色失常水災兵起移近北河則國邑沒爲澤歲星犯爲大水一曰出南爲旱熒惑守田不治客星犯水道不通伏兵在水中一曰客星若水火守犯百川流溢彗孛出爲大水爲兵穀不成流星入天下有水穀敗民饑赤雲氣入爲旱饑

四瀆四星在東井南參之東江河淮濟之精也明大則百

川決

軍市十三星狀如天錢在參東南天軍貿易之市有無相通也中星衆則軍餘糧小則軍饑市空士卒離叛月入爲兵起五星入犯守軍糧絕天下以饑亂兵起客星入刺客起將離卒亡流星出爲大將出

野雞一星在軍市中主變怪出市外天下有兵守靜吉芒角動搖兵起五星入守若流星抵之將死兵散

丈人二星在軍市西南王壽考悼耄矜寡以哀窮人星亡人臣不得自通

子二星在丈人東主侍丈人側不見爲災

孫二星在子星東爲天孫侍丈人側相扶而居士孝慈不

見爲災

闕丘二星在南河南天子雙闕諸侯兩觀也動搖宮中有變太白熒惑守兵戰闕下客星守爲兵亦爲有賊有奸臣彗孛出兵起天子不安其宮赤氣入宮中有火災

狼一星在東井東南爲野將主侵掠主南夷盜賊芒角動搖則兵起明盛兵器貴色黃白爲凶赤爲兵一曰明盛海寇作亂動搖胡兵大起變色天下亂盜賊滿野有白芒人徒聚月犯昴兵不戰一曰有水事五星犯兵大起多盜彗孛犯盜起赤雲氣入有兵

弧矢九星旌狼星東南天弓也主行陰謀以備盜常屬矢以向狼武審曰天弓張則北兵起又曰天下盡兵動搖明

大則多盜變色失常兵大起芒角躁怒四海兵變狼爲寇盜弧司其失矢直狼則盜息矢不直狼爲多盜引滿則天下盡爲盜一曰弧矢動移不如常者多盜賊胡兵大起狼弧張害及朔天下乖亂客星入南夷來降出入之爲兵出入流星入北兵起屠城殺將赤雲氣入民驚一曰北兵入中國

老人一星在弧矢南一名南極常以秋分之旦見於丙候之南郊春分之夕沒於丁見則治平天子壽昌不見則兵起歲荒君憂客星入爲民疫一曰兵起老者憂流星犯老人多疾一曰兵起白雲氣入國當絕

與鬼四星王觀察奸謀天目也爲朱鳥之目一曰天廟東

北星主積馬東南星主積兵西南星主積布帛西北星主積金玉隨變占之中央星爲積尸孛孛然色白如粉絮主死喪祠祀一曰鐵鎖主誅斬鎖如星非星但氣而已故口積尸氣欲其忽忽不明明則兵起動搖民疫水災以起兵人死如麻月犯鬼軍將死歲星犯穀傷民饑饉惑犯兵起入之賊在君側有兵喪填星守爲旱太白入犯爲兵亂臣在內一曰將有誅貫之而怒下有叛臣久守下有兵爲旱爲火辰星犯五穀不登客星犯國有自立者敗彗星犯兵起國不安星孛其下有喪兵起流星犯鬼鎖有戮死者入則四方來貢

燿四星在鬼宿西北軒轅西主烽火備邊亭之警急以不

明爲安明大則邊有警動搖外兵大入公不見戒在守候之官太白犯守邊警急

外厨六星在杓南天紀北爲天子之外厨主烹宰以供宗廟占同天厨

天社六星在弧矢南昔共工氏之臣勾龍能平水土故祀之以配社其精上爲星明則社稷安不明國危動搖則下謀上太白熒惑犯國易主守則有祠事於國內出之有祠事於國外彗出若入犯社稷再造

天紀一星在外厨南主知禽獸齒歲

杓宿七星天之厨宰也主尚食和滋味爾雅曰味謂之杓杓鶉火也又主木功又主雷雨一曰天大將軍一曰天庫

一曰柳爲鳥注主木草鳥喙朱鳥口也星明吉不明國失政開張人饑歟亡不見都邑振動直則爲兵就聚兵滿野歲星犯國多義兵熒惑犯色赤大而芒角官中憂火災守之有兵逆臣在側太白犯有急兵逆行勾己臣謀主晝見爲兵辰星犯歲早客星犯色蒼白殺邊地諸侯彗星犯爲兵爲喪星孛於柳南夷叛

酒旗三星在軒轅右角南酒官之旗也主宴享飲食太白犯公卿有謀

星宿七星一名天都一曰員官正午位赤帝府也主衣裳文繡又主急兵又主烽候明大吉暗小爲災動則兵起離則易政益天曰七星爲朱雀頸頸者文明之粹羽儀所承

歲星犯主憂兵五穀多傷熒惑犯橋梁不通逆行則地動
爲火災出入畱舍其國失地水決太白犯兵暴起大臣爲
亂經天防詐僞辰星犯賊臣在側守則其分有憂萬物不
成兵從中起彗犯有亂兵起武密曰彗星出七星狀如杵
爲兵星孛於七星有亂兵起宮殿流星犯爲兵憂又曰入
則有急使來蒼白雲氣入貴人憂出則天子用急使赤入
爲兵黃則遠人來貢

軒轅十七星在七星北后妃之主士職也一曰東陵一曰
權星主雷雨之神南大星女主也次北一星夫人也屏也
上將也次北一星妃也次將也其次諸星皆次妃之屬也
女主南小星女御也左一星少民后宗也右一星太民太

后宗也欲其色黃潤而明大小有序其小星明與大星等
后宮乖爭妃妾僭奪移徙出外民流胡地移徙入內胡人
來民大饑武密曰后妃後宮之象陰陽交合感爲雷激爲
電和爲雨怒爲風亂爲霧凝爲霜散爲露聚爲雲氣立爲
虹蜺離爲背猶分爲抱珥此一十四變皆權主之軒輊中
央土神黃帝之舍也彗孛犯女主爲寇一曰兵起流星入
後宮多讒亂乙巳占流星出后有中使出

內平四星在中台南執法平罪之官明則刑罰平

天相三星在七星北酒旗南丞相大臣之象五星犯守后
妃將相憂黑雲氣入爲將疾

天稷五星在七星南農正也取百穀之長以爲號明則歲

豐暗或不具爲饑移徙天下荒歉

張宿六星爲嗥爾雅鳥張嗥郭璞云鳥受食之處也王珍
寶宗廟所用及衣服又主天厨飲食賞賚之事又主四國
貢方物之庫又主長養萬物星明大吉暗小爲災不見貴
戚作亂移徙天下有逆就聚爲兵月犯將相久熒惑犯功
臣當封入則兵起又曰色如四時休王其分貴人安社稷
無虞又曰熒惑春守諸侯叛逆行守爲地動爲火災又曰
將軍驚土功作又曰會則不可用兵填星入爲兵出則其
分失地太白犯國憂守之其國兵謀不成留舍其國兵起
辰星犯守五穀不成兵起大水入爲火災出則有叛臣客
星犯天子以酒爲憂出入於張兵起國饑舍留不去前將

軍有謀又曰利先起兵彗星犯國用兵民凶守爲兵出爲
早又曰犯守君欲移徙宮殿星孛於張爲民流爲兵大起
蒼白雲氣入庭中觴客有憂黑爲其分水災色赤天子將
用兵

天廟十四星在張宿南天子祖廟也明吉微細其所有兵
軍食不通客星中犯兵起

太尊一星在太微旁占與斗北太尊同

翼宿二十二星爲鳥翼天之樂府主俳倡戲樂又主外夷
遠客負海之賔星明大禮樂興四國賓動搖則蠻夷使來
離徙帝將舉兵就聚天下相侵伐明盛芒動則王者用兵
征四方月犯國憂其分有兵大將亡歲星犯五穀爲風所

傷熒惑犯其分民饑邊兵起出入畱舍爲兵守之佞臣爲
亂填星出入畱舍兵起太白入犯皆爲兵起出入畱舍大
風水災舍左爲旱辰星守旱饑民流龍蛇見守其中兵大
起客星入犯國有兵一曰負海國有使來守之爲兵起彗
星犯國有兵喪星孛於翼大臣憂出則其地有謀下有兵
喪芒所指有降人流星犯出則其下有兵乙巳占曰流星
入天下賢士入見南夷來貢赤雲氣出入有暴兵
東甌五星在翼南主蠻夷天文錄曰東甌東越也星芒角
動搖蠻夷叛太白熒惑守其地有兵客星入蠻夷君長以
金玉來彗出蠻夷起亂

軫宿四星主冢宰輔臣主車騎主載任有軍出入皆占於

軫又主風占灾喪明大則法駕備就聚則兵起動則車騎
用轄二星傳軫兩旁主王侯左轄爲王者同姓右轄爲異
姓星欲小而明去軫七寸若一尺爲常遠軫凶明大與四
星等兵大起轄進退車騎發復其所爲兵罷有兵在外而
轄遠軫亦爲兵罷轄舉南蠻侵車無轄國有憂月暈而生
背氣其下兵起城拔視背所向擊之勝歲星犯爲兵災爲
民疫入則其國將灾熒惑犯有亂兵入軫將軍爲亂水傷
稼民多妖言逆行爲火爲兵填星犯爲兵入則兵敗出入
舍留六十日兵起大旱太白犯兵起得地入爲兵守之亾
地將憂起左角逆行至軫失地經天則兵滿野辰星犯民
疾守之大水入則天下以火爲憂客星犯爲兵爲喪入則

有土功羅貴諸侯使來出則君使諸侯守之邊兵起民饑
守轄軍吏憂彗星犯爲兵喪又曰天子起兵星孛於軫亦
爲兵喪又曰下謀上流星犯有兵起亦有喪不出一年庫
藏空春夏犯爲金革用秋冬爲水旱不調

長沙一星在軫宿中楚有長沙取此主壽命明則君壽長
子孫昌明與軫四星等兵大起

軍門二星在青丘西天子六軍之門主營候設豹尾旗與
南門同占明大芒角兵起星非其故及客星犯守皆爲道
不通

土司空四星在軍門南主土功主界域亦曰司徒均明吉
微暗則稼穡不登遠人離叛天下亂太白熒惑守犯歲大

饑兵大起客星犯守土功大作有兵災彗犯兵起民流
青丘七星在軫東南蠻夷之國號星明則夷兵盛動搖夷
兵爲亂流星入蠻夷來歸

器府三十二星在軫宿南樂器之府也明則八音和君臣
平不明則反是

步天歌 井八星橫列河中靜一星名鉞井邊安兩河各
三南北正天鐔三星井上頭鐔上橫列五諸侯侯上北河
西橫水欲兌積薪東畔是鉞下四星名小府水位東邊四
星序四瀆橫列南河裏南河下頭是軍市軍市團圓十三
星中有一箇野雞精孫子丈人市下列各立兩星從東說
闕丘兩箇南河東丘下一狼光蓬茸左畔九箇彎弧弓一

矢擬射頑狼胸有箇老人南極中春秋出入壽無窮 鬼
四星冊方似木櫃中央白者積尸氣鬼上四星是燿星天
狗七星鬼下是外厨六箇枹星次天社六星弧東倚社東
一星名天紀 枹八星曲頭似垂枹近上三星號爲酒宴
享大酺五星守 星七星如鈎枹下生星上十七軒轅形
軒轅東頭四內平平下三箇名天相相下稷星橫五靈
張六星似軫在星旁張下只是有天廟十四之星冊四方
長垣少微雖向上星數歌在太微旁太尊一星直上黃
翼二十二星大難識上五下五橫著行中心六箇恰似張
更有六星在何處三三相連張畔附必若不能分處所更
請向前看野取五箇黑星翼下頭欲知名字是東甌 軫

四星似張翼相近中央一箇長沙子左轄右轄附兩星軍
門兩黃近翼是門下四箇土司空門東七烏青丘子青丘
之下名器府器府之星三十二已上便爲太微宮黃道向
上看取是

戎事類占卷之十二

豫章李克家嗣宗甫輯

古歙胡文海鵬運甫校

星類六

凡天文在圖籍昭昭可知者經星常宿中外官凡百一十八名積數七百八十三星皆有州國官宮物類之象其伏見蚤晚邪正存亡虛實潤涸及五星所行合散犯守陵歷闕食彗孛飛流此皆陰陽之精其本在地而上發於天者也

凡五星木近日則遲遠日則疾火近日則疾遠日則遲土平行無太遲疾金水附日而行此大槩也

凡五 東行為順西行為逆超舍而前為盈退舍而後為縮又云失次上至三宿曰盈躁急之象也失次而下二三宿為縮畏退之象也 光而明滅不定曰動不安之象也

光明出生鋒曰芒 芒長四出曰角 長而偏出曰彗

芒謂之正旗正旗所指者受殃戰則順旗所指者勝

凡五星同度相及者曰合又曰相去一尺內曰合一日同舍曰合 同宿曰聚亦謂之會一日光芒相逮曰會 未當去而去曰出未當來而來曰入一日行而造其中曰入入宿而緩曰舍一日所居曰舍 入此宿曰宿一日畱二十日以上曰宿 處其所曰居一日依度至而不去曰居 不東不西曰畱 依其傍而居曰守一日居之不去

曰守一曰徘徊不去其度曰守一曰居其宿曰守一行而
侵之曰犯一曰經過其星光芒及之曰犯一曰七寸以內
光芒相及曰犯又曰自下往觸之曰犯又曰相去五寸而
光芒不接亦輕若相去雖一尺以內而光芒相射亦以犯
占先犯而後留之曰犯守未當入度而經犯之曰侵
東西正當曰中自上而下壓之曰乘自下而直往上曰
凌一曰相冒過曰凌又曰突掩爲凌相冲而指曰觸一
曰兩動直前相抵曰觸一曰行而直前冲之曰觸相凌
曰鬪一曰合而復離曰鬪一曰相擊曰鬪東入西出曰
貫相逼切曰磨周之一匝曰環環之不周曰繞
迫而侵之曰薄又曰相值相逼曰薄勾者左去右回右

去左回如勾字之狀已者往而復還如已字之形一曰去而復回爲勾繞之而去爲已一曰東西爲勾南北爲已一曰形如勾曰勾如已曰已 刺者過其傍而光刺射之也 掩者當其所而滅其光也 食者侵其邊而漸及其中如蠶食葉之狀一曰星月相凌不見者則所食也 吞者從上直下掩之也 戴者頂之於上也 星食月者星襲月中月食星者月至星沒也 同光者二體相合不辨其孰爲彼而孰爲此也 經天者昏旦出於地木火土陽星不忌金水陰星經天則爲妖也 晝見者白日出見與日爭光者也 李淳風曰聚者自三星以上爲聚聚者積會之象福聚則吉刑聚則凶先至則吉後至則凶 從者經

歷次第相及於一也次第從就之象

離者雖同宿共度

而南北乖隔不和之象也

徙者雖同在宿分不相倚待

起行移去相避之象也

舍者經其宿而行遲也

宿者

經其宿而過徑去不遲也

侵者越理而進以大迫小自

上適下漸至損害也

凌者以小迫大直往凌之也

抵

者一動一靜而直至其所也

歷者以次相及而過也

經者由其中過而無所犯也

貫者直經其中過也兵出

入之象

角者長大於芒興兵誅伐之象也

大者大於

本體興建開拓之象小者小於本體亾滅衰敗之象逆者

違逆之象和者和順之象遲者徐緩之象疾者急迫之象

舍者二星相遇同處一宿之中中和則吉逆而刑凶一

逆一順一遲一速相會於一宿之中爲會德會則福興刑
會則禍作 留者久居其宿作興勃亂之象中者中傷之
象掩食主并吞滅亡之象乘凌主協迫暴橫之象戴者主
有所立也 自上墜下曰隕兵亂旱饑 自下而上曰升
君以火憂 橫飛而去曰矢兵災益甚 兩星從行曰同
舍奸邪謀逆 大而去速曰奔災禍急速 相去七寸以
裏曰合五寸以裏曰犯奸謀作逆 兩星相抵曰凌君危
民災 兩星相觸曰鬪兵起血戰 從行相及廬而復圓
曰襲陰謀暗害 當去復止曰守禍大災深 當去復還
曰留禍亂不息 當去反行曰逆禍難最凶 周匝不離
曰環繞禍害連綿 東西相繞曰勾南北相勾曰巳狀如

乙巳字樣乙巳周蔽其星不見曰掩如太陽掩星之類竝主奸邪叛逆

一曰星晝見若星與日竝出名曰嫁女星與日爭光武且弱又且強女子爲王在邑爲喪在野爲兵二曰恒星不見恒星者在位人君之類不見者象諸侯之背畔不佐王者奉順法度無君之象也三曰星闕星闕天下大亂四曰星搖星搖人衆將勞五曰星隕大星隕下陽失其位災害之萌也又曰衆星墜人失其所也又曰當其下有戰場天下亂期三年又曰彗星之所墜其下有兵又曰星隕如雨天子微諸侯力政國有兵凶則星墜爲鳥獸天下將亡則星墜爲飛蟲天下大兵則星墜爲金鐵天下大水則星墜爲

土國主凶有兵則星墜爲草木兵起國亂凶則星墜爲沙
星墜爲人而言者善惡如其言又曰國有大喪則星墜爲
龍 凡五星守犯列宿皆爲凶咎若逆行或環繞勾已之
其禍尤大 凡五星有變則其精散爲妖星

凡五星見伏留行逆順遲速應歷度者爲得其行政合於
常違歷錯度而失路盈縮者爲亂行亂行則爲天矢彗孛
而有凶國革政兵饑喪亂之禍云

五星爲五德之主其行或入黃道裏或出黃道表猶月行
出入有陰陽也終出入五常不可以筭數求也其東行曰
順西行曰逆逆則遲通而率之終爲東行矣不東不西曰
留與日相近而不見曰伏伏與日同度曰合其留行逆順

掩合犯陵變色芒角凡其所主皆以時政五常五官五事之得失而見其變

木火土三星行遲夜半經天其初皆與日合度而後順行漸遲追日不及晨見東方行去日稍遠朝近中則留留經旦過中則逆行逆行至夕時近中則又留留而又順先遲漸速以至於夕伏西方乃更與日合金水二星行速而不經天自始與日合之後行速而先日夕見西方去日前稍遠夕時欲近南方則漸遲遲極則留留而近日則逆行而合日在於日後晨見東方逆極則留留而後遲遲極去日稍遠旦時欲近南方則速行以追日晨伏於東方復與日合此五星合見遲速逆順留行之大經也昏旦者陰陽之

大分也南方者太陽之位天地之大經也七曜行至陽位當天之經則虧昃留逆而不居焉此天之常道也三星經天二星不經天三天兩地之道也

凡五星所出所行所直之辰其國爲得位得位者歲星以德熒惑以禮填星有福太白兵強辰星陰陽和所行所直之辰順其色而有角者勝其色害者敗居實有德也居虛無德也色勝位行勝色行得盡勝之

古歷五星之推亾逆行者至甘氏石氏經以熒惑太白爲有逆行夫歷者正行也古人有言曰天下太平五星循度亾有逆行日不食朔月不食望熒惑主內亂太白主兵月主刑內臣不治四夷不服兵革不寢刑罰不錯故二星與

月爲之失度三變常見及有亂臣賊子伏尸流血之災大變乃出甘石氏見其常然因以爲紀皆非正行也

凡五星爲政歲緩則不行急則過分逆則占熒惑緩則不入急則不出違道則占填緩則不還急則過舍逆則占太白緩則不出急則不入逆則占辰緩則不出急則不入非時則占五星不失信則年穀豐昌

凡五星同色天下偃兵百姓安寧歌舞以行不見災疾五穀蕃昌

凡五星盈縮失位其精降於地爲人歲星降爲貴臣熒惑降爲童兒歌謠嬉戲填星降爲老人婦女太白降爲壯夫處於林麓辰星降爲婦人吉凶之應隨其象吉

營室爲清廟歲星廟也心爲明堂熒惑廟也南斗爲文太
室填星廟也亢爲䟽廟太白廟也七星爲貞宮辰星廟也
五星行至其廟謹候其命

五星分天之中積於東方中國大利積於西方夷狄用兵
者利

凡五星所聚宿其國王天下從歲以義從熒惑以禮從填
以重從太白以兵從辰以法以法者各以其事以法致天
下也三星若合是謂驚立絕行其國外內有兵與喪民人
乏饑改立侯王四星若合是謂大盤其國兵喪竝起君子
憂小人流五星若合是謂易行有德受慶改立王者奄有
四方子孫蕃昌亡德受罰離其國家滅其宗廟百姓離去

被滿四方五星皆大其事亦大皆小其事亦小

凡五星早出爲巖巖爲客晚出爲縮縮爲主人五星巖縮
必有天應見杓

太白猶軍也而熒惑憂也故熒惑從太白軍憂離之軍却
出太白之陰有分軍出其陽有偏將之戰當其行太白還
之破軍殺將辰星殺伐之氣戰鬪之象辰星出東方太白
出西方若辰星出西方太白出東方爲格野雖有兵不戰
辰星環繞太白若鬪大戰客勝主人更死視其所指以名
破軍

凡有軍謹候太白辰星出太白出辰星不出太白爲客辰
星出太白爲主人出而與太白不相從野雖有軍不戰辰

星出太白不出辰星爲客太白出辰星爲主人一出一不出爲主客不備野有軍不戰其出也一東而一西不戰若俱出一方而異宿軍雖相近不戰必合宿乃戰相凌乃有大戰 太白辰星俱出東方不相近二十日至三十日辰星入東方南國有兵不戰至春夏兵起 辰星太白俱出西方不相近二十日至三十日辰星不入西方北國有兵 太白辰星同出東方皆赤而角瀕海之國大敗 太白辰星同出西方皆赤而角中國大敗 辰星隨太白出東方天下無兵兵起期六十日太白出辰星北客勝辰星出太白北主人勝 辰星太白俱出東方色黑外國利中國不利 辰星隨太白出西方天下有兵不戰亦不解辰星

居其前兵罷若抵太白環繞之居西北陰國兵起居西南陽國兵起期半年兵在外必戰利客不利主人 太白隨辰星出西方無兵兵起期六月有兵客利相近去可四尺客益利不戰則兵未解辰星入則兵罷 太白出東方辰星居其前不去至十五日若二十日而入陰國兵滅不戰辰星出西方居太白前不去十五日若二十日而入陽國兵滅去則兵罷 太白出東方若西方辰星居其後二十日兵起辰星居其前十五日兵罷辰星歷太白左小戰歷太白右數萬人戰主人吏次辰星過太白右三尺軍急約戰出太白北小戰主人勝出太白南大戰 辰星過太白其間可容劒小戰客勝居太白前三日軍罷出太白左

小戰出其右大戰辰星來抵太白不去將死正其上出客
勝下出客敗 太白辰星相遇太白避之客強主人畏死
太白出辰星右而居其前主人利逐入主人大利 辰星
迫太白云主人強客畏主人辰星出太白右而居其前客利
逐去入之主人不利客大利 辰星入太白中五日乃出
及入而上出破軍殺將客勝下出客敗 太白與辰星合
太白居右辰星居左主人勝辰星居右太白居左客勝
天下無兵辰星在東方若西方居太白前水中兵有滅者
太白辰星俱出西方辰星居太白前相近間可客劔在
西北陰國有兵謀以戰主人勝在西南陽國有兵謀以戰
則客勝 太白辰星合在西南南國之事在西北北國之

事正南爲中國之事

凡五星至二星相合聚間火失光爲兵喪爲旱木失光人主惡之土失光女主惡之金失光兵起亦爲喪水失光爲大水以日占之 五星相聚逆行者其事逆臣奪主國五星聚而闢天下大戰寇賊竝起民庶流離夷狄內主五星聚惟土星有芒角者所舍之國大凶

凡五星歲與填合則爲內亂與辰合則爲變謀而更事與熒惑合則爲饑爲旱與太白合則爲白衣之會爲水 太白在南歲在北名曰牝牡年穀大熟太白在北歲在南年或有或亡 熒惑與太白合則爲喪不可舉事用兵與填合則爲憂主孽與辰合則爲北軍用兵舉事大敗 填與

辰合則將有覆軍喪師與太白合爲疾爲內兵 辰與太
白合則爲變謀爲兵變 一曰火與水合爲淬與金合爲
鑠不可舉事用兵 土與金合國亡地與木合則國饑與
水合爲雍沮不可舉事用兵有覆軍

木火土合在一舍爲旱饑有土功一曰國分相去三尺以
內守七日以上天下兵起五穀大傷人相食七寸以內名
曰芒交臣弑其君期八十日 火土水合女子爲天下害
大臣逆 木金土合其國兵起不戰 水土金彗會同舍
相去三尺兵起大戰相去七寸以內曰芒交外內構謀弑
其君 火土金合天下有大謀 木火金合殺大將天下
皆有兵三王鼎足其分國亡 金水土合其國將戰不勝

亾地 火木水合用事者當之天下開牢大赦

水火二星合爲更政革命其分有兵君憂人愁歲星熒惑陽也太白辰星陰也陽主中邦陰主外邦陰與陽合中外連兵陽與陽合兵謀在中國陰與陰合兵謀在外國又曰相近曰犯其殃大相遠曰合其殃小 木與火合爲饑爲旱一曰大臣匿謀有反者主亾地國有水一曰爲內亂臣謀主戰北軍困 木火合相去七寸以下光芒相及臣害君一曰火木同舍相去三尺以內相守七日以上其國有反臣五穀傷民不安期其年二尺以內相守七日至二十日兵起國滅內戚相殘期一百八十日 木火合而相守其國君憂守十日以上穀貴人作亂火在木北有軍大戰

火在木南偏將戰客軍憂 水火合於一舍火在木上名
曰子母同光其國大強弱之百日不變色失次其國且以
重德致天下 水火合於宿之陽母子同鄉其國安合於
宿之陰兵起 水火同行疾兵從之戰不勝 熒惑當出

見而近歲星出其北天下有急兵出其南有厯謀在其中
水火接芒與東方宰相亂人主計不定不出三年大兵
起 水火接芒與西方國有憂明年春失農時 水火合
色俱青爲疾赤爲兵黃旱白喪黑饑芒角接人必殆諸
水火再合有走王再合者東行已合西行又合也

水土合爲內亂爲饑爲變謀更事人主失勢 水土合其
分戰不勝亡地主火 水土合井泉高而平原出雲歲不

登有大水又口天下易主民流千里魚鼈陸死民苦盜賊
其分國不可戰戰必敗 水土合相守十日則天降禍不
義者受其殃 木與土合一舍木在下土在上名曰雌雄
間客軍大敗主人勝六十日不下有空國徙王 水土同
舍相去三尺以內相守二十日以上國更主天下大爭大
臣相仇天子易統天下存亡者半 水土合有兵相守土
在木下利客土在木上利爲主人 水土同出其宿國亡
地同入其宿國得地 水土皆出東方夕入西方百九十
日皆正中者兵發東方之國勝當入不入反東行九十日
正中者當發兵主死民流亡

木金合爲水爲饑爲疫光芒相接有兵兵戰殺大將無兵

亂起或曰有軍則先起者勝金在水南以兵饑金在水北
以水饑皆有凶國 木金同光大戰殺將不同光兵起不
戰 金木同在一舍其年有蝗蟲生 木金同舍相去一
尺天下有兵不出四十日必戰星色青東方勝色赤南方
勝色黃中央勝色白西方勝色黑北方勝 木金合相去
五尺有兵戰三尺有破軍二尺有拔城一尺治兵光芒相
接大戰無兵在外則兵大起 木金合相去三尺相守七
日以上將軍誅死 木金合三尺內七寸以外木出金左
有爭出金右年饑 金在南木在北名曰牝牡相承年穀
大熟金在北木在南歲困有凶國 木金合於東方木在
北金在南陰陽合為年豐木金合於西方木在金位名曰

伐其國凶 金木俱出東方若併入西方王者亡地 木
金相遇有兵兵罷無兵兵起乍東乍西有逐相 太白出
歲星北客勝歲星出太白北主人勝 歲星隨太白出於
西方光怒必戰破軍殺將若環繞之有次王無兵在外則
兵起相走 金木一東一西害侯王一南一北兵自伏
金木合金從木疾主人急木從金疾客急

木水合爲變謀更事其國多水民饑 水木合爲內亂有
軍在外不利先起者若相守七日至四十日人流亡芒相
及則外與內謀其君 木水合一曰將歿光芒相接天下
水泉湧出

火土合國憂主走爲內亂爲兵一曰大旱一曰女子爲天

下害一曰王憂兵起又曰其下失地有破國一曰其國不可舉事用兵又曰火土所合宿國饑戰不勝 火土合火去而復來環繞之不出六年國亡 火土合土在火上名曰逆其國防外兵土在火下各不動名子母同光其國得地益強若同上下民有逆心兵起更王一曰土在火上光芒相接女主憂 火土合火入土光中將相憂

火金合金在火上所在之國且以義致天下一曰金居火上其國用兵三十日不去天下三年起兵六十日不去其下有空國 金先居火上而復出火下其國有反臣 金在火左右其國必大敗 火在金前後左右成戰客勝 金在火東無兵兵起不出三月 火金合火入金光芒中

火在南大旱戰則小將死火在北爲水 火與金合金從
火有兵兵罷火從金兵大起火從金而金無光火赤而光
所入宿受兵國亡 火隨金行七日以上追及金相去尺
以下大臣死其分旱其國受兵戰敗亡地一曰金火相隨
而行所入宿國君死人饑流亡道上多死人有亡國 火
金合而金起芒角居火上其國用兵戰勝 火入金出其
陰不有分軍必有他急

火與水合有軍在外不利先起者一曰火水合大旱赤地
千里國主走秋合有兵冬合有喪 火水合於東方臣謀
主一曰水火合於東方水色白而大兵在外割地爲和從
前國大病從旁小病 火與水合在他時爲淬在冬爲刑

水火同行若不有兵疾疫流行火經水命曰自伐不可
用兵必有大敗覆其國家以及其君凶

土與金合爲喪爲內兵國凶地相守數十日不去后有內
亂 土在金南一尺女主用事在金北一尺女主死若行
去宿遠君不立后 金土合金在土南年穀大熟金在土
北歲偏無 土金同宿金在土上不出二月有兵民流
土金合爲水土在金北去之七寸母子同光其歲大豐
金土合土色青多死喪赤爲兵黃爲旱

土水合爲變謀更事又爲旱爲陰謀有兵爲將戰其分將
軍死敗無兵爲內亂

金水合爲兵憂爲變謀爲邊兵戰 金水同出東方東方

有兵同出西方西方有兵 金水竝出東方利舉兵西伐
東軍勝金水竝出西方利舉兵東伐西軍勝金水俱出東
方或俱出西方客主相見有兵必戰無兵兵起

凡歲熒惑太白填四星與辰關皆爲戰兵不在外皆爲內
亂 木與金關有大兵一曰國有內亂野有破軍又曰無
兵兵起有兵兵戰又曰其國旱饑不可舉兵又曰夷狄內
侵有易相又曰人流徙有亡國一曰兵在外爲亂戰敗一
曰相爲亂有滅諸侯民多死亡有土功 木金關於東方
有兵在外必戰關於西方有亡國死王又曰其年八月兵
起流血 木火合關殺大將 木與土關不出其年王者
亡地將軍死之一曰其國先起兵者敗一曰天下哭泣相

望期六十日又曰有易相又曰星色青爲喪赤爲旱白爲
兵黑爲水黃爲土功 木與水關有兵在外則戰無兵爲
內亂將死一曰有亡國不出三年 木與金關其野有破
軍殺將一曰有戰兵不在外而在內大戰將死歲大饑
金木合關有大兵 金火春關其歲旱夏關內主易秋關
兵大起冬關女喪王者憂將軍死 火與水關國以衆敗
一曰女爲天下害又曰火水關於東方臣伐主關於西方
宮中有亂一曰火水關將死其野有大水 火與土關其
國子弟爲亂一曰不出其年有亡國一曰有叛臣作亂兵
起一曰王者亡地將軍死之一曰其下國有圍邑 木與
金關期九十日憂王者亡地一曰有兵喪更立侯王一曰

臣謀主兵起

土與金鬪東方臣伐君鬪西方強國官中

有亂一曰女主爲亂皆期九十日

金與水鬪其國內亂

兵起軍在外者破大將死一曰先起兵者凶若環繞之大將戰一曰不出其年有改王一曰有反臣一曰金水鬪其分國大旱一曰有大戰無兵在外則兵起一曰金水相遇而關辰星不勝燕趙代有憂太白不勝秦有憂不勝者其光分散或欽芒失色皆爲不勝土與水鬪軍在外則戰有死將無軍爲內亂兵起一曰水土鬪關梁不通

歲星犯熒惑爲旱爲饑有兵大戰

歲星觸熒惑其國亂

歲星食熒惑不出三年國亡

歲星守填星大臣相滅

天下交爭一曰有兵戰主人更死其國大穰一曰水土交

行必有破傷 歲星與填星守其地有王者興除舊布新

歲星犯太白有兵大戰一曰相死大臣黜女主喪一曰

其分草再生將軍誅無將軍則不出四十日有拜將 歲

星乘太白有戰偏將死 歲星觸太白四夷來侵 歲星

守太白蠻夷叛四序不順陰陽爽和 歲星犯辰星有兵

太子憂一曰民多病洩 歲星掩辰星有兵戰客將死滅

之殺大將貫之薄之殺偏將觸之主人病 歲星守辰星

主憂有賊水退國不安水退賊敗

熒惑犯歲星冊太子有赦一曰有兵戰一曰大臣有匿謀

一曰蟄蟲冬出雷早行禾不成一曰有戰火在木北天下

急出其南有謀在中一曰奸臣爲謀殺大將 熒惑守歲

星太子憂一曰大赦守後火入三度其國大敗退三度賊
敗火貫木殺小將 熒惑犯填星兵起大戰一曰女主當
之或曰火犯土土在下火在上其國吉土在上火在下大
臣憂一曰火犯土爲旱 熒惑觸填星有兵主病火入土
將軍爲亂 熒惑守填星旱兵起一曰殺太子有內賊王
者亡城守後火入三度國不安退三度則無咎 熒惑犯
太白主亡天下憂兵起大戰金在南南國敗在北北國敗
熒惑乘太白兵雖起不用其國且以武致天下 熒惑
觸太白有暴賊 熒惑經太白軍憂離之軍却 熒惑從
太白下上抵之不入軍急不戰 熒惑出太白陰有分軍
出其陽有偏將戰主人軍敗若環繞太白偏將死 熒惑

入太白中上出破軍殺將客勝出太白左左軍勝出太白
右右軍勝 熒惑入太白將戮入久不出國亂主憂 熒
惑環太白成勾已大將死 熒惑抵太白不入亦不出客
將死 熒惑摩太白而過有數萬人戰有破軍主人將死
熒惑薄太白主人不利亡偏將 熒惑襲太白兵起相
易一曰軍亡 熒惑犯太白金主不安守其北太子憂守其
南庶子憂守後入三度國大敗退三度災消一曰火金相
守流血滿野 熒惑犯辰星其國不可舉事用兵一曰野
有兵不戰一曰兵在外者敗 熒惑觸辰星有異姓者王
熒惑守辰星太子憂有赦守後入三度大兵聚其下退
之水災

填星犯歲星內亂一曰其野有兵相攻 填星守歲星有
兵守後木退歲歉土退年豐有賊 填星犯熒惑大人忌
之若二星皆色赤或俱無光或土在火芒內火在土芒內
皆爲其國大人死旱潦災物不成 填星犯太白爲兵一
曰大水草木死 填星犯辰星爲旱爲變謀更事一曰將
有危一曰土犯水冬雷虹出來年夏寒隕霜雨雹

太白犯歲星王者有賊一曰爲饑期三年一曰兵起爲旱
一曰草木再生再死一曰金出木北客利木出金北主人
利 太白犯歲星環繞之若并光有兵戰破軍殺將一曰
太白環繞歲星有亡王 太白襲歲星君敗死 太白犯
熒惑主病有兵大戰客敗太白在南南國敗在北北國敗

東西亦如之 太白乘熒惑客軍敗隨之君憂 太白觸
熒惑內有賊臣 太白守熒惑太子憂其間容指血流滿
野若火退殺太子金退賊動 太白貫熒惑主人亡偏將
死 熒惑方行太白環之有破軍殺將 太白犯填星太
子不安國有咎一曰五穀不熟國饑人流 太白觸填星
主憂一曰人主放恣大臣相殘賊兵起 太白守填星太
白在鎮北天子失地守後太白退臣憂填退主憂有賊
太白犯辰星國不安兵起一曰金水相犯西方有人東方
大虛殃及匹夫 太白觸辰星殺宰相 太白守辰星國
憂辰星先退有異姓者王 太白來守辰星旬日不去客
將死

辰星犯歲星其國外野不安 辰星守歲星天非時降霜
辰星犯熒惑上妨太子下妨太尉司馬 辰星觸熒惑
太子不安若離而復合大水漂山人主哭於宮 辰星守
熒惑天下多死喪疾疫兵起 辰星犯填星夏寒妨女主
一曰春多雨水 辰星守填星夏霜雹春多雨 辰星守
太白為變謀為兵憂守之旬日不去主人兵不利將死
辰星犯太白兵起大戰破軍殺將辰星在上客勝在下主
人勝

戎事類占卷之十三

豫章李克家嗣宗甫輯

古歙胡文海鵬運甫校

星類七

歲星一曰攝提又曰重華曰應星曰經星曰紀星東方青
帝靈威仰之使蒼龍之神木德之精歲行一次十二年一
周天與太歲相應故謂之歲星歲星主道德在五常爲仁
五事爲貌仁虧貌失逆春令傷木氣則罰見歲星歲星主
春其日甲乙其辰寅卯其卦震巽其音角其數八其帝太
皞其神勾芒歲星所在其國有福逆之則怒爲殃尤甚歲
星主司天下諸侯人君之過主齊吳以東之國又爲農官

主五穀所居之宿五穀蕃昌其對爲衝乃有殃歲星所在之國不可伐可以伐人所留之野吉所去之野凶超舍而前爲羸退舍爲縮羸其國有兵不復縮其國有憂其將死國傾敗所去失地所之得地一曰當居不居國亡所之國昌已居之而又東西去之國凶不可舉事用兵安靜中度吉出入不當其次必有天祲見其舍也歲星羸縮以其舍命國其所居久其國有德厚五穀豐昌不可伐羸縮失次其國有變不可舉事用兵又曰人主之象也色欲明光潤澤德合同又曰進退如度奸邪息變色亂行主無福赤而角其國昌赤黃而沉其野大穰

元史云歲星八十三年而七周天與日合度者七十有六

九二百九十八日八十八刻而與日一合

石氏云歲星羸而東南見彗星羸東北見覺星縮西南見橈雲如牛縮西北見槍雲如馬槍橈梈彗異狀其殃一也至日行一尺出二十餘日乃入其國凶不可舉事用兵出而易所當之國是受其殃又曰妖星不出三年其下有兵及失地若國君喪

甘氏云歲星羸東南不出三月迺生彗本類星末類彗長二丈羸而東北不出三月迺生天梈本類星末銳長四尺縮而西南不出三月迺生天槍左右銳長數丈縮而西北不出三月迺生天橈本類星末銳長數丈必有破國危君伏歿其辜餘殃不盡爲旱凶饑暴疾至不出五年其下有

軍及覆地若國君喪又云金水二星附日而行出入有常
出早爲月食出晚爲天祲及彗星

歲星在春王色比左角大而青精光立春後滿七十二日
後十八日色黃仲春之時有芒角 在冬相其色精光而
無芒角 在夏休其色青黃無精光 在四季囚其色青
微黑 在秋囚其色細小不明此其常也如其常則天下
和平 歲星當王時而有相休囚囚色其進舍也有德令
其退舍也有惡令其畱守之舍有逆法有逐臣 當相時
而有王休囚囚色者其畱守之舍國凶其進舍也有兵其
退舍也相有逆謀不成 當休時而有王相囚囚色當囚
時而有王相休囚色者其畱守之舍國有禍喪其進舍也

有兵其退舍也將軍凶 當凶時而有囚色大赦 歲星
色赤爲兵一曰歲星色白多爲兵色青白而不光潤兵獄
竝起 歲星青白如灰主有憂期五月兵獄竝起 歲星
變色而赤芒角其國大旱歲饑有兵 歲星在東方宿中
色宜青而白角爲兵 在南方宿中色宜赤而青爲憂白
角而怒有兵 在西方宿中色宜白而青有憂赤黑皆爲
兵 在北方宿中色宜黑而青有憂赤爲兵白角而怒亦
爲有兵起 歲星變色若有芒角爲誅殺爲兵 歲星乍
大乍小其國凶乍明乍暗國憂主辱 歲星忽不見國凶
歲星出如浮而沉其國有土功如沉而浮其野凶浮者
見之沉者伏之 歲星芒角動搖其國凶芒角而怒所居

兵起五穀不登 歲星有芒角赤黃人主以武強若戰歲
星無芒角不勝 歲星芒角指者敗迎角而戰者亦敗
歲星五角芒天子自出將兵 歲星一角外射天子大使
出三角兵出有所誅 歲星七角且芒天子與四方戰期
不出一年 歲星九角且芒天子殺賢臣誅邊將期一年
歲星角且芒皆爲天子征伐四方 歲星王時常有芒角
無芒角則主威權在下 歲星超一舍二舍至於三舍侯
王不寧不則地動退一舍二舍至於三舍王者滅亡 歲
星順行列宿者喜也逆行有所陵犯皆爲凶災 歲星逆
行其國不可興兵順則兵宜進逆則兵宜退 歲星逆行
當遲而疾失一次以上至二次人主驚走社稷危亡天下

兵起民去其鄉歿者如山 歲星晝見爲臣強其地有兵
晝見與日爭光武弱文強大臣謀逆 歲星流國主亡
歲星順行不可逆戰逆行不可向之而戰 歲星舍守列
宿其色白爲敗常以春甲乙日候之變色則爲災

熒惑一曰赤星又曰罰星曰執法曰天侯南方赤帝赤熒
怒之使朱雀之神火之精也其行無常出則兵起入則兵
散熒惑居東方爲懸息西方爲天理南方爲熒惑或進退
無恒躁急促疾故曰熒惑其在五常爲禮五事爲視禮虧
視失逆夏令傷火氣則罰見熒惑熒惑主夏其日丙丁其
辰巳午其卦離其音徵其數七其帝炎帝其神祝融熒惑
主死喪主司天下羣臣之過惡驕奢亡亂妖孽主歲成敗

察過失以譴告人王者也主楚吳越以南諸國主憂患愆尤禍福之所由生其國有道則疾行而東無道則留而降罰爲賊爲疾爲喪爲饑爲兵所居之國受殃環繞勾已芒角動搖變色乍前乍後乍左乍右其殃彌甚周旋止息則爲死喪寇亂其野亾地熒惑失行而速兵聚其下順之戰勝又曰熒惑不動兵不戰有誅戮又曰熒惑爲天子之理內則理政外則理兵又曰熒惑逆行一舍二舍爲不祥居之三月國有殃五月受兵七月國半亾地九月地大半亾因與俱入國絕祀居之殃還至雖大當小久而至當小反大若芒角動搖環繞之及乍前乍後左右殃益大與他星關光相逮爲害不相逮不爲害其行東南西北疾也用戰

順之勝逆之敗

元史云熒惑七十九年而四十二周天與日合度者三十七凡七百七十九日九十二刻又百分刻之九十分而與日一合

熒惑在夏曰王色比心大星而大赤精光仲夏有芒角

在春曰相其色精光無芒角 在季夏曰休其色赤黃無

精光 在秋曰囚其色青白不明 在冬曰死其色黃黑

細而不明此其常也色如其常則天下和平 當王時而

有相休囚死色其畱守之舍不可舉事用兵其進舍也其

國不祥其退舍也其國有旱 當相時而有王休囚死色

其畱守之舍其國起兵其進舍也有蝗其退舍也赤地于

里 當休時而有相色其邦亂臣不從令有王色其國受殃有囚色有小兵有死色盜賊橫行廟堂有火其畱守之舍受殃 當囚時而有王色大臣憂有相色臣下毀傷有休色使者道踣有死色丁壯從軍其進舍也有兵其退舍也有妖言其畱守之舍道路不通 當死時而有王色宗廟不享有相色大臣攝政有休色宗廟火災有囚色丁壯多死於兵其畱守之舍其下有兵其進舍也多風其退舍也流水湯湯 熒惑變色而黑有大水暴兵至 熒惑色赤黃發疾黑青發難黃若赤一歲內發白色期二年青色期三年黑色期四年至五年以星行尺寸深淺爲期應熒惑色蒼細小而無精明名曰進賊讒臣入國不有以君

必爲亂國 熒惑無光先起兵者敗 熒惑赤芒南方國

利青芒東方國利黑芒北方國利黃色中國利色黑而芒

所居之野有殃 熒惑色大赤而芒不出三年兵喪並起

色青角其國有兵憂 熒惑色青有大兵旱色變正赤其

秋有兵 熒惑色赤而芒兵在外大戰無兵兵起 熒惑

赤大燦然而芒其地有兵大而赤角有兵出攻戰客利

熒惑有芒角以戰皆不利隨其所指而擊破軍殺將 熒

惑出色赤怒逆行成勾已戰凶有圍軍勾已有芒角如鋒

刃人主出宮下殿 熒惑始出大而入益小者其國不利

熒惑晝見臣謀主所在分兵起大旱水竭 兩軍相當

有雲獨掩熒惑有覆軍外將 熒惑出東方反行而西有

小星擊之卽去其所宿之國受兵 熒惑疾行而東命曰
狡狡者止其相火疾行而西命曰滑滑者起其將火疾行
而南命曰讒讒人興疾行而北命曰賊賊乃作 熒惑從
北入南曰持不出三年其國有喪兵起南方持謂持水入
火 熒惑從南失行而北有兵兵罷天下旱是謂以火入
水 熒惑出列宿之南爲孽出列宿之北復入爲羸逆爲
縮如是者其下必有伏尸積骨 熒惑春夏失道南行疾
爲旱兵在陽國秋冬失道北行疾爲火入水必有破軍殺
將 熒惑所在之國不秋起兵若畱守之必有殃禍 熒
惑所止三月以上國憂一曰大將死五月破軍亡地七月
其下地半亡居九月地全亡 熒惑已去而復還守之其

殃尤甚從陰之陽亾地三百里從陽之陰亾地二百里從
前之後亾地二百里從後之前亾地三百里 熒惑以庚
辛日留天下有大兵 熒惑出東方若西方遲留者其國
不利留一月以上爲饑爲兵 熒惑變色失行所留者亾
所抵者兵往來疾期九十日遲者期不過三年 熒惑行
二十八宿正乘其宿星有軍在外留之三日戰敗大將歿
熒惑舍守列宿其色黑爲敗常以夏丙丁日候之變色
則爲災

填星一曰地侯中央含樞紐之使勾陳之神土之精也填
星常晨出東方夕伏西方其行二十八宿而一周天歲填
一宿故曰填星在五常爲信五事爲思仁義禮智以信爲

本貌言視聽以思爲主故四星皆失填星乃爲之動其歲
侯王不寧縮有軍不復填星主四季其日戊巳其辰丑未
辰戌其卦艮坤其音宮其數五其帝黃帝其神后土女主
之象所在國有福不可伐主聚衆主土功主正紀綱主周
梁主太常主司天下女主之過填星正則女主正邪則女
主邪一曰填星天子之星也天子失信則填星大動又曰
填星所居國吉未當居而居之若已去而復還居之國得
上不乃得女子當居不居旣已居之又東西去之國失土
不乃失女子不有土事若女之憂居宿久國福厚易福薄
當居不居爲失填其下國可伐衝者不可伐旣已居之又
東西去之其國凶不可舉事用兵失次而上一舍三舍有

王命不成不乃大水失次而下二舍有后惑其歲不復不
乃天裂若地動

元史云填星五十九年而二周天與日合度者五十七凡
三百七十八日九刻又百分刻之一十六分而與日一合
填星在四季之時曰王其色正黃比北極中央大星而精
明有芒角 在夏曰相其色黃大而精明無芒角 在秋
曰休其色黃白無精明 在冬曰囚其色黃黑不明 在
春曰死其色青白細小而不明此其常也如其常則天下
和平 當王時而有相休囚死色其畱守之舍有厚德其
進舍也其國得土其退舍也失土 當相時而有王休囚
死色其畱守之舍其國女主微其進舍退舍皆爲土功憂

事 當休時而有王相凶死色其畱守之舍國人流亡進
舍退舍皆有殃 當囚時而有王相休死色其畱守之舍
及進舍其國嗣子憂退舍有喪 當死時而有王相休囚
色其畱守之舍國有凶殃其進舍也地動若有蛇怪其退
舍也人多流亡 填星色赤而潤澤不出其年兵起 填
星赤而芒角有兵喪凡填星色赤爲最惡 填星赤而角
期九十日兵起赤而芒有兵火 填星色青白不出五月
其國兵起又曰青多爲兵白多爲獄青白等兵獄俱起
填星之相也從立夏至夏至其色當赤而小精明無芒角
及季夏之時比北極中央大星赤黃而光明有芒角季秋
之時色當比奎大星黃白而光明有芒季冬之時色當比

左角青黃而光明有芒季春之時色當比參左肩黃白而
光明有芒填星在四方宿中如其方色吉 填星三黃芒
而角土功興 填星赤黑芒兵起期三月 填星九芒大
水不則天裂若地動 填星三黑芒其國凶 填星七角
俱芒女主專政妄殺 填星出角爲旱若失色五角則有
兵戰 填星逆行其國凶逆行一舍爲水民去其邑逆行
二舍有兵凶地逆行三舍王者死 填星至其宿不居卽
去之其國無道可伐 填星行列舍或居其北往來不安
其國不可興土功不可舉事用兵 填星出北方宿中其
國不利用兵出東方宿中所出之國兵強出南方宿中其
下用兵者凶地出西方宿中其國兵起 填星光明盛大

其國大昌微小其國受殃 填星大如狼星而色黃天下
之兵雖合其國不亡 填星變色失行於戊巳之日及辰
戌丑未之月或寅卯之月皆爲大凶 填星晝見臣謀君
女主憂上相死 填星芒角有土功聚衆事 填星出彗
所居國受兵亡地 填星舍守列宿色青爲敗常以四季
月戊巳日候之變色則爲災

太白一日殷星又曰太正曰營星曰明星曰觀星曰大威
曰太皞曰衆星曰相星曰大嵩曰大爽曰序星晨見東方
曰啓明夕見西方曰長庚西方白帝白招矩之使白虎之
神金之精也大而色白故曰太白在五帝爲義五事爲言
義虧言失逆秋令傷金氣則罰見太白太白上公之號大

將軍之象太白進退以候兵高卑遲速靜躁見伏皆象之
吉主刑殺主秦雍河華蜀漢以西之國其日庚辛其辰申
酉其卦乾兌其音商其數九其帝少昊其神蓐收出以辰
戌入以丑未其出入也必以風雨太白金主威王斷割殺伐
故用兵必占之

元史云太白常與日相近一年一周天八年而五合於日
退合者亦五凡五百八十三日九十刻又百分刻之二十
六分而與日順逆兩合

太白兵象也出而高用兵淡吉淺凶埤淺吉淡凶行疾用
兵疾吉遲凶行遲用兵遲吉疾凶角敢戰吉不敢戰凶擊
角所指吉逆之凶進退左右用兵進退左右吉靜凶圍以

靜用兵靜吉趨凶出則兵出入則兵入象太白吉反之凶
赤角戰

日方南太白居其南日方北太白居其北爲羸侯王不寧
用兵進吉退凶 日方北太白居其南日方南太白居其
北爲縮侯王有憂用兵退吉進凶 當出不出當入不入
爲失舍不有破軍必有死王亡國一曰天下偃兵野有兵
者所當之國大凶 當出不出未當入而入天下偃兵兵
在外 未當出而出當入而不入天下起兵所至破國
未當出而出未當入而入天下舉兵所當之國亡 當期
而出其國昌 出東爲東方入爲北方出西爲西方入爲
南方所居久其國利易其鄉凶 入七日復出將軍戰死

入十日復出相次之入又復出人君惡之 已出三日而復微入三日廼復盛出是爲哭而伏其下國有軍其衆敗將北 已入三日又復微出三日乃復盛入其下國有憂師雖衆敵食其糧用其兵虜其帥 出西方失其行夷狄敗出東方失其行中國敗 太白出蚤爲月食晚爲天矢及彗星將發於亾道之國 太白出而留桑榆間病其下國上而疾未盡期日過參天病其對國 凡太白所出所直之辰其國爲得位得位者戰勝所直之辰順其色而角者勝其色害者敗太白白比狼赤比心黃比參右肩青比參左肩黑比奎大星色勝位行勝色行得盡勝之

太白在秋曰王其色比狼精明而有光於仲秋之時有芒
角 在四季曰相其色精明而無芒角 在冬曰休其色
精明而無光 在春曰囚其色青黃而不明 在夏曰死
其色赤黑細小而不明此其常也如其常則天下和平
當王時而有相色主弱將強權勢從橫天下有兵有休色
臣有謀主者有囚色所任官者囚有死色大將野死其留
守之舍兵起其進舍也其下兵歸之其退舍也兵弱不用
當相時而有王色主弱將強有休色將不用命有囚色
將謀不成有死色將死其留守之舍有兵其進舍也是謂
趣兵其退舍也兵出不行 當休時而有王色其野多賊
有相色兵起民亂有囚色外人從橫有死色軍死於野其

畱守之舍有逐將其進舍也武吏從橫其退舍也文吏弄
權 當囚時而有王色其分國有叛將有相色下犯其上
有休色其野多暴兵有死色有妖言言不祥其畱守之舍
不可舉事用兵其進舍也歲多霜雹其退舍也冬暖不藏
當死時而有王色流水湯湯有相色野火煌煌有休色
錢幣不行有囚色國多狼虎其畱守之舍野獸食人其進
舍也白刃搶搶其退舍也兵不成行 太白金主西雖其體
大而色白光明而潤澤所在之分兵強國昌體小而昧軍
敗國亡 太白出東方色黃而明出西方高而色白此其
常也 太白圓大怒而色赤天下有兵盛而不戰赤而芒
角乃戰 太白色猛赤次白而蒼悴而不光是謂失色其

所在國雖得地擊之必克 太白色黃黑軍在外者宜罷
之 太白始出色赤有兵主人勝 太白色蒼白而靜天
下厭兵 太白色黑而大青芒角陰國大勝戎兵乃來風
災數起國多賊盜有大獄大兵 太白色黑秋破師 太
白色白而無角以戰不勝 太白色青而暗小國有大憂
太白色赤而怒兵起國多火災 太白色赤者武也利
以戰色白者文也不利以戰 太白白圓不可戰白角有
喪赤角有兵戰 太白光明見影其國戰勝 太白細小
不明天下盜賊多而不發覺所居國尤甚 太白芒炎然
而上大兵起炎然而下則有天狗下於其野有流血 太
白見一芒兵起不用見二芒有戰見三芒天下兵起四芒

諸侯外於境五芒天下更制十芒皆鈎其國不戰而受地
太白芒出長而銳大利攻戰順芒所指擊之勝 太白
赤而角將戰勝無角戰不勝 太白所在之鄉芒日增長
如行過維此威武之氣也不可不備 太白五角有立將
六角有取國七角成王四角有赦三角而動有反城胡兵
起 太白過宿角長取地長角短取地短角外指得地內
指失地期一年 太白芒角動搖盜賊羣起兵旱竝作
太白初出大而後小其國兵弱先勝而後亡初出小而後
大其國兵強先敗而後成 太白出而大甲兵煌煌旌旗
相望太白出而小有城不能守有兵不能戰 太白出而
赤圓大而光期不出九十日兵大起 太白出而小後大

在東方陽國兵起在西方陰國兵起 太白未當出而出

東方名曰重華吏虐民擾不得耕織 太白未當下而下

東方名曰少歲其歲饑鬼神不享 太白未當出而出西

方名曰長強有聚卒兵起 太白未當下而下西方名曰

白消有喪吏民帶劒刃者不葬 太白不當出而出主躁

臣熾軍破國亡 太白出西方順行至四正西方之國吉

出東方逆行至四正東方之國吉四正午也出西則從西

至午止出東則從卯至午止不得過午也過午則爲經天

凶 太白出東方以辰巳爲極逆行不至巳而返陽國強

陰國戰不勝過巳不及午陽國霸天下及午天下聽命於

陽國出西方以申未爲極順行不至未而返陰國強陽國

戰不勝過未不及午陰國霸天下及午天下聽命於陰國
太白昏至未丁間大將憂晨至巳丙間小將歿 太白
出南不得過申北不得過酉失行而北過酉名曰返生不
利侯王失行而南過申不利用兵一曰太白失行而南不
有破軍必有屠城北國當之太白失行而北天下兵大起
失行而南一曰有兵兵罷期三年 太白出卯南南國勝
出卯正東東國勝出西南南國勝出西北北國勝出酉正
西西國勝 太白出巳殺大將出未陽國傷出戌胡兵起
不戰 太白出戌入未是謂犯地刑絕天維其國受兵將
多傷 太白出東方若西方過營室強國興不及營室而
返還入強國敗 太白行失道爲將有奸小失道爲大奸

逆行而失道者尤甚 太位居實有德也居虛無德也

太白出於辰之南鄭得位行不失色黃而赤大而有角勝

行失而蒼小敗 出於辰卯之間宋得位行不失色黃而

赤大而有角勝行失而黑小敗 出於寅之北趙得位行

不失色黃芒而有角勝行失而蒼小敗 出於寅卯之間

衛得位行不失色黃大而有角勝行失而蒼小敗 出午

未之間吳越得位行不失色蒼赤而有角勝行失而黃小

敗 出於申之南楚得位行不失色赤大而有角勝行失

而黑小敗 出於申酉之間秦得位行不失色白大而有

角勝行失而赤小敗 出於戌之北燕得位行不失色黑

大而有角勝行失而黃小敗 出於酉戌之間齊得位行

不失色蒼大而有角勝行失而白小敗 太白始出西南
維在日月之陽陽國之將傷在其陰陽國利出西南維在
日月之陰陰國之將傷在其陽陰國利 太白出東北維
匈奴有兵相攻 太白行疾爲武利以戰行遲爲文以戰
不利 太白已入而未出不可起兵 太白入東方未出
西方其六十五日爲陽六十五日爲陰以此時用兵雖勝
有殃 太白入西方未出東方其十五日爲陽十五日爲
陰以此時用兵戰必敗一曰太白入西方未出東方南方
之國起兵雖戰勝得地後必敗亡地太白入東方未出西
方北方之國起兵雖戰勝得地後必敗亡地 太白不見
若有客軍來挑戰宜應之不可先擊待其先動而應之勝

太白始出東方西方之國不可舉兵始出西方東方之國不可舉兵違之者兵敗國亡 太白晨出東方平旦見辰巳間寇來淡入謹守勿戰去亦勿追 太白出東方爲德舉事用兵左迎之吉出西方爲刑舉事用兵右背之吉 一曰出軍宜背刑向德交戰宜背德向刑 太白以其時出陽四十日不動先起兵者不利又曰在陽國利其以陽時出於陰重利 太白始出西方小而圓澤有光敢戰者吉不敢戰者凶 太白出至其國之日不見其兵弱可擊得其將太白不見三日有亡國喪師 太白入七日而復出將軍戰死 太白不上下下而留桑榆間病其下國若出一百六十日不能參天主卑令不行民亂多盜若出未

滿一百六十日而上過參天至尊令行政理無盜一日過
參天病其對國參天者三之一也過參天則在西戌之間
也 太白始出未可擊也色盛未可擊也色衰未可擊也
色死急擊勿失不擊客將爲主人色死者赤黑也 太白
變色而逆行不可戰太白在秋三月出西方色當白不白
而逆行凶且有金石之妖若星隕而爲石石之所下寇至
其野當祠蓐收及西海之神以穰之吉 太白晝見有兵
兵止無兵兵起一日太白秦星也晝見秦國兵強 太白
晝見與日爭明四海兵起一日強國弱小國強女主昌
太白經天天下革民更主人流亡天子失位刑罰苛而攻
戰行則太白經天經天者謂出東方而入西出西而入東

也太白陰星出西則當伏西出東則當伏東過午則經天經天則天下革命晝見與經天不同晝見謂當晝而見經天則順行至未或逆行至巳而不伏故昏旦當午而見所以出東而入西出西而入東也五星木火土爲陽星不以昏旦過午爲嫌金水陰星附日而行昏旦而見於午則放恣甚矣故其殃爲大凡經天則必晝見以其去日遠也晝見則不必經天故各自爲占也 太白出而墜地其下山摧石裂大水枯竭 太白流其國兵敗將死 太白自暈天下有赦有兵不出二十日其國失軍 太白出攘氣三丈大水兵起 太白出攘氣明大風道上無灰塵不出三月糴貴五倍不出年中有兵 太白出氣長三丈若五六

丈大風雨兵起所指軍民狙驚 太白出彗出西南維中國受兵亾地 太白出彗出西北維胡狄受兵亾地 太白舍守列宿色赤爲敗常以秋三月庚辛日候之變色則爲災

辰星一曰安調又曰細極曰能星曰鉤星曰司農曰兔星曰小武曰同農曰鼎星曰小爽北方黑帝叶光紀之使玄武之神水之精也辰星之出常在四仲出以辰戌入以丑未二旬而入晨候之東方夕候之西方附日而行其出入也不違其時故曰辰星辰星宰相之象又爲廷尉主刑法殺伐將戰鬪有軍在野爲偏將軍無軍則官主和陰陽在五常爲智五事爲聽智虧聽失逆冬令傷水氣則罰見辰

星辰星主冬其日壬癸其辰亥子其帝顓頊其神玄冥其
音羽其數六其卦坎主燕趙代國主刑獄險阻之事辰星
所在有權智用兵爲主失其時則寒暑失節國當大饑辰
星出入必以陰雨不則陰風辰星又爲夷狄之事及刑法
之得失皆於辰星觀之又曰辰星出蚤爲月食晚爲彗星
及天矢一時不出其時不和四時不出天下大饑失其時
而出爲當寒反溫當溫反寒當出不出是謂擊卒兵大起
與他星遇而闕天下大亂出於房心間地動

元史云辰星其行常與日相近一年一周天四十六年合
於日者一百四十五退合亦然凡行一百一十五日八十
七刻又百分刻之六十分而與日順逆兩合

辰星在冬曰王色比奎大星青白精明而有光仲冬之時
有芒角 在秋曰相其色精明無芒角不搖 在春曰休
其色青黃微小無精光 在夏曰囚其色黃黑小而不明
在四季曰死其色青赤小而不明此其常也如其常則
天下和平 當王時而有相休囚死色其畱守之舍國不
祥其進舍也與五星合天下有謀其退舍也五星及之不
可舉事用兵 當相時而有王休囚死色其畱守之舍其
國破亡其進舍也與五星合其國有殃其退舍也五星及
之不可舉事用兵 當休時而有王相囚死色其畱守之
舍其國多災小兒其進舍也與五星合天下有水其退舍
也五星及之其國不可舉事用兵 當休時而有王色夏

雨霜雪有相色秋有暴兵有休色流水湯湯有死色暴獄
兵興其留守之舍五穀不生其進舍也與五星合有德令
其退舍也五星及之不可舉事用兵 當死時而有王相
休囚色其留守之舍有疫其進舍也與五星合其年穀不
登其退舍也國有兵不成行 辰星色比織女大星爲正
青比左角黑比亢此常色也又曰辰星正色春當青黑夏
當赤黑四季當黃黑秋白冬黑則吉其變色也色白而大
兵起 辰星赤圓爲兵赤角兵大起黑角憂水有小戰
辰星色黑三芒天下有兵兵止無兵兵起有水災黃角有
爭地 辰星其時宜効不効爲失其當効而出也色白爲
旱黃爲歲熟赤爲兵青爲疫黑爲水 辰星出東方大而

白有兵於外鮮常在東方其色赤中國勝外國敗出西方
色赤外國勝中國敗天下無兵於外而赤兵起 辰星生
角有小戰 辰星色黃而小出而易處天下之文變而不
善色赤犯我城黃角地之爭 辰星之色春青黃夏赤白
秋青白而歲熟冬黃而不明即變其色其時不昌春不見
大風秋則不實夏不見有六十日之旱月食秋不見有兵
春則不生冬不見陰雨六十日有流邑夏則不長 辰星
舍守列宿色黃為敗常以冬壬癸日候之變色則為災